

CENTRALNA BANKA
BOSNE I HERCEGOVINE



ЦЕНТРАЛНА БАНКА
БОСНЕ И ХЕРЦЕГОВИНЕ

INFO CBBiH



U ovom broju:

ŽELIMIRA RASPUDIĆ
IMENOVANA
VICEGUVERNERKOM CBBiH



NASTAVLJENE PRIPREME
ZA OBILJEŽAVANJE 20.
GODIŠNJICE CBBiH



15 GODINA OD PUŠTANJA
U OPTICAJ NOVČANICE
OD 200 KM



GUVERNER SOFTIĆ
PRISUSTVOVAO
EKONOMSKOM I
FINANSIJSKOM DIJALOGU
EU I ZAPADNOG BALKANA I
TURSKE U BRISELU



GUVERNER SOFTIĆ NA
SAMITU GUVERNERA,
MINISTARA FINANSIJA I
DIREKTORA POREZNIH
UPRAVA ZEMALJA
REGIONA



Izdavač: Centralna banka Bosne i Hercegovine;
Adresa: Maršala Tita 25, 71000 Sarajevo

Priprema: Služba za odnose sa javnošću

Prevod tekstova na engleski jezik: Služba za odnose sa javnošću

Lektura (jezici bh. naroda i engleski jezik): Služba za publikacije i biblioteku i
Služba za protokol i prevodenje

Web stranica: <http://www.cbbh.ba>
E-mail: pr@cbbh.ba
kontakt telefon: (033) 278 123

ŽELIMIRA RASPUDIĆ IMENOVANA VICEGUVERNERKOM CBBiH



Na svojoj 8. sjednici u 2017. godini, održanoj 29. 5. 2017. godine u Banjaluci, Upravno vijeće Centralne banke Bosne i Hercegovine (CBBiH) imenovalo je Želimiru Raspudić viceguvernerkom CBBiH.

Imenovanje je izvršeno na mandatni period od četiri godine, počev od 1. 7. 2017. godine.

Novoimenovana viceguvernerka je zadužena za Sektor za statistiku, servisiranje vanjskog duga, EU integracije i platne sisteme.

Inače, gđa Raspudić posjeduje veliko iskustvo u bankarskim poslovima, posebno u finansijama i međunarodnom poslovanju te revizorskom poslovanju. Također, posjeduje veliko iskustvo u vođenju različitih projekata u bankarstvu (uvođenje SWIFT-a, Twinning program EBRD-a, uvođenje EUR, pripajanja banaka). Radila je na niz rukovodećih pozicija u bankarskom sektoru i izvan njega, a ima i zvanje ovlaštenog internog revizora.

NASTAVLJENE PRIPREME ZA OBILJEŽAVANJE 20. GODIŠNJICE CBBiH



održana 22. 9. 2017. godine u Sarajevu, pokrenute su aktivnosti na definisanju pojedinih zadataka vezano za konferenciju. Upravno vijeće CBBiH je, također, odobrilo predloženu strukturu i sadržaj monografije koja će biti izdata povodom obilježavanja godišnjice. U okviru priprema za organizovanje numizmatičke izložbe pod nazivom „Tragom novca“ koja će zvanično biti otvorena 11. 8. 2017. godine u Zemaljskom muzeju Bosne i Hercegovine, definisana je postavka koja će obuhvatiti novac na tlu Bosne i Hercegovine od IV vijeka p.n.e. do danas. Istog dana, u večernjim satima, na fasadi zgrade CBBiH u Sarajevu biće postavljen video mapping u znaku „20 godina stabilnosti“. Utvrđen je vizuelni identitet obilježavanja godišnjice CBBiH, te odlučeno da bude snimljen korporativni film o nastanku i 20 godina rada CBBiH.

Tokom maja i juna, nastavljene su pripreme za obilježavanje 20. godišnjice Centralne banke Bosne i Hercegovine (CBBiH). Nakon što je Upravno vijeće CBBiH odobrilo Program međunarodne konferencije koja će, pod nazivom „20 godina stabilnosti“ biti

15 GODINA OD PUŠTANJA U OPTICAJ NOVČANICE OD 200 KM



Centralne banke Bosne i Hercegovine (CBBiH), a odobrio tadašnji saziv Predsjedništva Bosne i Hercegovine.

„Ovo je novčanica koja također ima snažne veze s eurom. To je jako dobro za Bosnu i Hercegovinu, jer je Evropa mjesto gdje leži budućnost Bosne i Hercegovine“, izjavio je tadašnji guverner CBBiH Peter Nicholl, te dodao: „Prva veza je da je nova novčanica vezana za euro currency board aranžmanom. Nova novčanica od 200 KM vrijedi 102,25 eura. Druga veza s eurom je slika mosta na poleđini novčanice, a most je prisutan i na novčanicama eura. Mislim da je ovo novčanica na koju Bosna i Hercegovina može biti ponosna“.

Prije 15 godina, 15. 5. 2002. godine, promovisana je i u opticaj puštena novčanica od 200 KM. Riječ je o novčanici najvećeg apoen za koju je karakteristična jedna varijanta dizajna, jedinstvena za cijelu BiH, za razliku od svih prethodnih novčanica manjih apoen, koje imaju dizajn za Federaciju BiH i dizajn za Republiku Srpsku. Na licu ove bh. novčanice nalazi se lik Ive Andrića, poznatog književnika i dobitnika Nobelove nagrade za književnost, a na naličju novčanice most na rijeci Drini u Višegradu, motiv iz njegovog romana „Na Drini ćuprija“. I na ovoj novčanici se ravnopravno koriste oba pisma, i latinica i ćirilica. Odluku o dizajnu novčanice od 200 KM donijelo je tadašnje Upravno vijeće

Novčanicu od 200 KM štampala je austrijska kompanija Oesterreichische Banknoten und Sicherheitsdruck GmbH (OeBS), a dizajner novčanice je Robert Kalina, čovjek čiji se dizajn nalazi i na novčanicama eura. Kalina je izjavio da je novčanica od 200 KM, po sigurnosnim elementima, skoro jednaka novčanicama eura, pa je tako jedna od najsofisticiranijih i najzaštićenijih novčanica na tržištu. „Prilikom izrade novčanice uspio sam kreirati važne dijelove tako da sam s njima zadovoljio dizajnerske, ali i sigurnosne zahtjeve. Tako, nova novčanica nije samo lijepa, nego ju je veoma teško i krivotvoriti, čak i uz najmoderniju opremu“, rekao je Kalina na promociji novčanice sada već daleke 2002. godine.

GUVERNER SOFTIĆ PRISUSTVOVAO EKONOMSKOM I FINANSIJSKOM DIJALOGU EU I ZAPADOG BALKANA I TURSKE U BRISELU



Guverner Centralne banke Bosne i Hercegovine (CBBiH) dr. Senad Softić u Briselu je, u maju 2017. godine, prisustvovao ministarskom sastanku o redovnom godišnjem ekonomskom i finansijskom dijalogu između Evropske unije i zemalja Zapadnog Balkana i Turske. Ovaj sastanak u Briselu predstavljao je zaokruženje procesa konsultacija i nadzora nad implementacijom trogodišnjih programa ekonomskih reformi. Navedenim procesom je omogućeno zemljama kandidatima i potencijalnim kandidatima sa Zapadnog Balkana i Turske da sa EU institucijama imaju dijalog i zajedničke zaključke o ekonomskim, fiskalnim i strukturalnim mjerama na vrlo sličan način kao što se provodi i za članice Evropske unije (tzv. Evropski semestar). Zemlje Zapadnog Balkana i Tursku predstavljali su ministri finansija i guverneri centralnih banaka, dok su EU predstavljali ministar finansija iz Malte, kao predsjedavajuće zemlje Vijeća Evropske unije, i dva ministra iz zemalja koje će biti predsjedavajuće Vijeća EU (Estonija i Bugarska).

Govoreći o procesu reformi, guverner dr. Softić je pozdravio nastavak kontinuiranog dijaloga između bh. vlasti i predstavnika EU, naglasivši da Bosna i Hercegovina ima jake ekonomske i finansijske veze sa EU i da će dalja integracija države zavisiti od koordinacije i razumijevanja ekonomskih politika i strukturalnih reformi. Tom prilikom je istakao da su tokom proteklog perioda vlasti poduzele niz aktivnosti na održavanju makroekonomske stabilnosti i unapređenju poslovnog okruženja u državi.

„Treba istaći implementaciju Reformske agende, gdje se paralelno radi veći broj aktivnosti koje za krajnji cilj imaju unapređenje poslovnog okruženja, rješavanje problema vezanih za tržište rada, te stvaranje okvira za održivost javnih finansija. Radilo se i na dogovaranju i implementaciji ekonomskih mjera u okviru novog programa sa Međunarodnim monetarnim fondom koje su, također, usmjerene na održivost javnih finansija i finansijsku stabilnost, a treba dodati i da su bh. vlasti u procesu davanja odgovora na Upitnik EU, koji je velikim dijelom posvećen ekonomskim politikama“, rekao je guverner, dodavši da su sve navedene aktivnosti rađene u skladu sa preporukama iz Ekonomskog i finansijskog dijaloga i izrazio je nadu da će, uprkos velikom broju i obimu zadataka, one biti uspješno i relativno brzo okončane.

Tokom obraćanja, guverner Softić se osvrnuo i na ekonomska kretanja u prethodnom periodu, istakavši da ekonomija Bosne i Hercegovine pokazuje znakove oporavka. S obzirom na pozitivna kretanja u okruženju, očekuje se nastavak rasta i investicija u 2017. godini uz nisku inflaciju, uz aranžman currency board, koji ostaje temelj stabilnosti u našoj državi. Finansijski sektor je ostao stabilan. Bankarski sektor pokazuje veći nivo kapitalizovanosti i profitabilnosti, a posebno ohrabruju poslednji pokazatelji koji ukazuju na veću kreditnu ekspanziju. Očekuje se da će niz strukturalnih reformi kroz kreiranje novih radnih mjesta i poboljšanje poslovnog okruženja uticati na smanjenje nezaposlenosti.

Guverner je dodao da će CBBiH, u skladu sa svojim mandatom, nastaviti pružati institucionalni okvir kroz očuvanje monetarne i finansijske stabilnosti, radeći na jačanju bankarske koordinacije i uloge Stalnog odbora za finansijsku stabilnost, unapređujući rad platnih sistema, unapređujući jedinstvene registre, pružajući pravovremene i iscrpne statistike, uz aktivnu ulogu institucije u procesu EU integracija.

Guverner Softić je svoje obraćanje završio zahvalivši se EU institucijama na kontinuiranoj podršci, uz očekivanje da će dijalog sa EU institucijama i dalje imati ključnu ulogu u procesu definisanja ekonomskih politika, te pravnih i institucionalnih reformi u cilju postizanja harmonizacije u državi.

INFO
CBBiH



GUVERNER SOFTIĆ NA SAMITU GUVERNERA, MINISTARA FINANSIJA I DIREKTORA PORESKIH UPRAVA ZEMALJA REGIONA



Guverner CBBiH, dr. Senad Softić učestvovao je na Samitu guvernera, ministara finansija i direktora poreskih uprava zemalja regiona koji je održan u Bečićima, Crna Gora, a čija tema je bila „Finansijska stabilnost regiona u novom globalnom okruženju“.

Guverner Softić je bio panelista u sesiji pod nazivom „Monetarna politika zemalja regiona – između Američkih federalnih rezervi i Evropske centralne banke“.

Tokom svog izlaganja, guverner je stavio poseban akcenat na potrebu koordinacije između monetarne i fiskalne politike, te na značaj prisustva MMF-a s aspekta BiH.

„U uslovima valutnog odbora, monetarna politika je neefikasna za stimulisanje ekonomske aktivnosti. Međutim, nema nikakve dvojbe da je, sa stanovišta finansijske stabilnosti, neophodna koordinacija monetarne i fiskalne politike“, istakao je guverner Softić.

Prisutnima je, također, pojasnio princip formalne saradnje nadležnih institucija u BiH na polju očuvanja finansijske stabilnosti kroz Stalni odbor za finansijsku stabilnost (SOFS). SOFS predstavlja glavni forum za procjenu prijetnji po finansijsku stabilnost, pri čemu su CBBiH i agencije za bankarstvo odgovorne za procjenu sistemske prirode finansijske krize.

U vezi s prisustvom MMF-a u BiH, guverner je pojasnio osnovne karakteristike trenutnog aranžmana s Fondom. Guverner je rekao:

„Servisiranje postojećeg iznosa vanjskog duga je neupitno sa ili bez aranžmana s Fondom, ali bi bez strukturalnih reformi za koje se opredijelila vlada, dugoročno posmatrano, bh. ekonomija bila u lošijoj poziciji usljed usporavanja rasta potencijalnog outputa. Pored toga, aranžman s Fondom se trenutno od strane međunarodne zajednice i rejting agencija posmatra kao stabilizacioni faktor u BiH, te je uslov i za aranžmane s drugim međunarodnim institucijama. Prema tome, i bez Fonda BiH bi bila u mogućnosti finansirati obaveze, ali bismo imali znatno manje fiskalnog prostora za stimulisanje ekonomskog rasta kroz vladine investicije i potrošnju. Posljedično, bez provođenja reformi na koje smo se obavezali i Pismom namjera, ostali bismo na približnom nivou razvoja na kojem smo sada“.

